



PRIMEIRU MINISTRU

DISKURSU SUA EXELÉNSIA PRIMEIRU-MINISTRU KAY RALA XANANA GUSMÃO NIAN

**Iha okaziaun
Simpóziu OceanX Timor-Leste: Siénsia ba Futuru ne'ebé Azul**

**“Husi Siénsia ba Asaun: Aplikasaun konkluzoens husi misaun OceanX
Timor-Leste 2025 ba ekonomia azul no ba prioridades oseánikas Timor-Leste
nian”**

**Sentru Konvensoens Díli
28 agostu 2026**



Palácio do Governo
Avenida Marginal
Dili, Timor-Leste

Exelénsias,
Membrus Governu
Membru Korpu Diplomátiku no Parseiru Dezenvolvimentu sira,

Exelentísimu CEO OceanX, Senhor Vincent Pieribone

Membrus husi Organizasoens Naun Governamentais, comunidade akadémika no husi setor privadu

Karus sientistas, téknikus ho kolaboradores OceanX
Karus estudante sira no membru fakuldade sira

Karus amigus,

Lori Governu nia naran ho povu Timor-Leste tomak, mak ho onra no ksolok boot ha'u hato'o boas-vindas ba ekipa husi Misaun OceanX iha ita-nia país. Ita-boot prezensa iha-ne'e, Mr. Vincent, hanesan ona sinal konfiansa iha Timor-Leste nia potensial no iha valor ne'ebé ami-nia tasi bele ofereba mundu.

Ba ema sira ne'ebé la koñese OceanX, organizasaun ida-ne'e rekoñesida iha mundu tanba investiga maravillas (ka, buat furak sira) iha oseanu ho teknolojia avansada. Bainhira hatudu mai ita koñesimentu ne'ebé sira hetan no hakbesik públiku ba tasi, OceanX inspira ita atu harii “futuru azul” ida — futuru ida ne'ebé proteje oseanu no liuliu proteje moris tomak iha planeta.

Governu Timor-Leste komprometidu tebetebes ho dezígnio no vizaun ida-ne'e.

Simpóziu ida-ne'e, ne'ebé Governu Timor-Leste ho OceanX mak organiza hamutuk, expresa tebes duni vontade: atu traduz siénsia iha asaun, transforma koñesimentu iha política no halo atu oinsá deskoberta sira husi ita-nia oseanu bele serve, tebes duni, dezenvolvimentu sustentável iha ita-nia rai.

Señoras no señores,

Povu timor luta durante dékadas ba nia liberdade. Bainhira finalmente ita ukun-rasik-an, mak foin sai klaru katak ita-nia liberdade labele to'o de'it iha tasi-ibun. Tanba ne'e mak luta ba delimitasaun ita-nia fronteiras marítimas, labele haketak husi ita-nia luta ba soberania povu ida ne'e. Ho determinasaun ne'ebé hanesan, direitu ne'ebé hanesan atu goza tomak — ekonómika, sosial, kultural ho ambientalmente — buat ne'ebé ita-nian.

Tanba ne'e, mak ohin-loron, ita haree ba ita-nia tasi ho ambisaun foun ida.

Ita-nia país bele rai ki'ik ida. Maibé bainhira hateke ba tasi, ita mós nasaun boot tebetebes ida. La'ós de'it tanba nia beleza, la'ós tanba hanesan elementu sentral ida husi ita-nia kultura ho identidade — maibé tanba nia potensial ne'ebé boot lahalimar.

Timor-Leste situa iha rejioens ne'ebé ho rikeza vida mariña boot liuhotu iha planeta tomak, mak Triângulu Koral. Ita-nia tasi iha kondisoens únikas atu bele observa ka haree baleias, golfiñus ho animal boot sira seluk iha tasi laran, besik loos husi tasi-ibun. Husi sorin seluk, ita-nia resifes koral serve hanesan abrigo no fatin moris ba ikan sira, invertebrados, lenuk tasi ho dugongus.

Oázis biodiversidade nian ida-ne'e hanesan verdadeiru tezouru iha planeta. Maibé priviléjiu ida-ne'e lori mós responsabilidade boot mai ita. Ita iha dever atu proteje, kuida no, liuliu, halo asaun.

Halo asaun hasoru ameasas globais ne'ebé ohin-loron sai reais liután: husi alterasoens klimátikas (ita haree iha Europa, iha Flores, Indonésia, iha Nepal), ne'ebé hamanas ita-nia bee no halo sa'e nível tasi; to'o poluisaun, ne'ebé halo vida mariña dada iis la di'ak; ho peska ilegal, Naun deklarada no Naun regulamentada, ne'ebé hasai husi tasi buat barak liu fali ne'ebé bele tau hikas.

Danus ka estragus hirak-ne'e ita labele hadi'a ona. No Timor-Leste la iha kbiit atu hasoru mesak de'it. Protesaun oseanu eziye uniaun, responsabilidade ho kooperasaun — rejional no internasional.

Tan razaun ida ne'e hotu mak Governu Timor-Leste nian konvida OceanX atu realiza misaun ida iha ita-nia país ne'e, iha kedas novembru tinan uluk. Misaun ida-ne'e rekolla ona dados foun kona-ba kartografia mariña, biodiversidade ho ekosistemas — dados ne'ebé sei tulun ita atu implementa di'ak liu ita-nia responsabilidades ho objetivus husi ita-nia Política kona-ba Ekonomia Azul.

Ita-nia jornada ba Ekonomia Azul hahú ho pasu simples ida: hatene ita-nia potencial iha tasi okus.

Exelências
Señoras no señores,

Ita-nia vizaun kona-ba Ekonomia Azul artikula tiha ona ho Planu Estrátégiku Dezenvolvimentu 2011-2030 no ho ita-nia kooperasaun estrátégika iha espasu ASEAN, iha rejiaun Pasífiku no iha valores ho objetivus ne'ebé partilla hamutuk iha CPLP.

Vizaun ne'e hatuur-metin iha pilares ne'ebé klarus no ida mak investigasaun sientífika mariña, ne'ebé artikula ho koñesimentu no práttikas tradisionais husi comunidade sira, nomós formasaun verdadeira “jerasaun azul” ida – ita boot sira, jovens sira, ita mak tenki sai jerasaun azul - liuhusi edukasaun ida ne'ebé haree ba oseanu.

Timor-Leste hakarak kria sistema parserias sientífikas no teknolójikas internacionais ida no realiza ninia primeiru Levantamentu ho Estudu Biodiversidade Mariña, ho envolvimento no kapasitasaun ba joven sira husi comunidades lokais.

Inisiativa ida-ne'e asosia ho objetivus estrátégikus seluk hanesan kriaun Sentrus Investigasaun no Edukasaun Mariña; Ordenamentu ho Jestaun Espasu Marítimu Nasional; estabelesimentu rede ida ba Áreas Mariñas Protejidas; ho kriaun Parke Nasional ida iha Ataúru.

Maibé, inisiativa ba konservasaun hirak-ne'e, la signifika labele book ita-nia rekursus mariñus. Ita tenke uza ita-nia rekursus mariñus ho neon matenek atu kria empregu, rendimentus ho oportunidades foun ba ita-nia povu.

Seguransa alimentar, dezenvolvimentu ekonómiku ho bein-estar sosial hanesan kondisoens moris ba ita-nia povu. Ita hakarak kria oportunidades iha konservasaun ho jestaun mariñas, maibé mós iha peska no akuikultura ne'ebé sustentáveis, iha turizmu marítimu, iha enerjias renováveis no iha atividade sira seluk ne'ebé bele jere/fo empregu dignu ba ita-nia povu, maibé la kompromete saúde oseanu nian, tasi nian, ne'ebé ita hotu depende ba.

Ita hakarak halo, maibé halo didi'ak, liuhusi modelu ida ne'ebé dezenvolvimentu ekonómiku ho protesun ambiental bele no tenke reforsa malu.

Ida-ne'e mak ita-nia Polítika kona-ba Ekonomia Azul. Ida-ne'e mak Simpóziu ida ne'e mai foti ba ita nia hotu hadomi ita nia tezouru iha tasi okus.

Ha'u agradese ba OceanX ba apoiu tomak ne'ebé fó ba Timor-Leste no tanba partilla ho ami, ohin-ne'e, ita-boot sira-nia koñesimentu sientífikus ho deskobertas.

Ha'u espera kata simpóziu ida-ne'e bele inspira sientistas ou organizasoens científikas seluk, nomós universidades, sosiedade sivil, setor privadu ho ita-nia comunidade tomak atu servisu hamutuk — ho determinasaun no ho vizaun.

Ha'u halo votus atu traballu sira ohin ne'e nian bele traduz iha rezultadus konkretus ba ita-nia povu, ba ita-nia tasi no ba futuru ida ne'ebé azul ba ita hotu.

Obrigadu barak.

Kay Rala Xanana Gusmão